

Valdi vinnuna fram yfir fótboltann

Daði Kristjánsson var ráðinn framkvæmdastjóri H.F. verðbréfa rétt fyrir jól. Hann er Akureyringur og starfaði áður hjá Icebank. Fótbolti og golf eru aðaláhugamálin en Daði lék með Þór á Akureyri, Stjörnunni og Víkingi.

SVIPMYND

Haraldur Guðmundsson | haraldur@frettabladid.is

„Ég þekki fyrirtækið mjög vel og hef eytt síðustu dögum í að fara yfir þær áherslur sem ég ætla að koma með hingað inn,“ segir Daði Kristjánsson, nýráðinn framkvæmdastjóri H.F. verðbréfa.

Daði hefur starfað hjá fyrirtækinu síðastliðin fimm ár og þar af í tæp þrjú ár sem forstöðumaður markaðsviðskipta. Hann er Akureyringur, ættaður úr Aðaldalnum og Hafnarfirði, og stúdent frá Menntaskólanum á Akureyri.

„Ég fór í iðnaðarverkfræði í Háskóla Íslands eftir stúdentinn. Síðan lauk ég einnig meistaraþráðu í fjármálahagfræði í febrúar á síðasta ári en ég tók þá gráðu með vinnu,“ segir Daði og bætir við að hann hafi unnið með námi frá því hann var ráðinn til Icebank, áður Sparisjóðabanka Íslands, í maí 2007.

„Ég var heppinn að komast þangað inn. Þetta var góður vinnustaður og ég fékk mikla ábyrgð strax frá fyrsta degi. Manni var hent út í djúpu laugina og þannig hefur það verið í gegnum minn feril. Maður hefur því bara þurft að læra að synda,“ segir Daði og heldur áfram:

„Það var gríðarlega lærdómsríkt að fara í gegnum hrúnið og fá að kynnast þessari geðveiki

sem var árið 2007. Þetta voru mín fyrstu kynni af markaðinum, mjög óheilbriggt allt saman, en mikil reynsla.“

Daði er mikill áhugamaður um knattspyrnu en hann lék sjálfur í efstu deild með íþróttafélaginu Þór á Akureyri. Hann lék einnig með Stjörnunni í Garðabæ og Víkingi en lagði skóna á hilluna svo hann gæti einbeitt sér að starfsframanum.

„Ég er þó alltaf að leika mér eitthvað í fótbolta og svo er ég mikill stuðningsmaður Tottenham,“ segir Daði og útskýrir að

hann sé bæði Þórsari og Stjörnumaður.

„Ég hef búið í Garðabænum frá 2008 og spilaði með báðum liðum. Svo hef ég líka verið mikill í golfinu síðustu ár og svo er maður einnig orðinn mikill fjármálanörd. Ég held að maður komist ekki áfram í þessum bransa nema hafa virkilega gaman af því sem maður er að gera og hafa brennandi áhuga á starfinu. Það er bullandi samkeppni í þessum bransa og þá þarf maður að vera vakinn og sofinn yfir þessu og það gerist ekki ef áhuginn er ekki til staðar.“

MÁLGLAÐUR KEPPNISMAÐUR



„Daði er eldklár og duglegur. Hann er laus við allan hroka og er jafnframt auðmjúkur í samskiptum sem ég held að nýtist

honum vel í starfi. Ég kynntist Daða fyrst á íþróttavöllum Akureyrar á yngri árum og þessi auðmjúkt hans kemur sjálfsgagt þaðan, enda áttu Þórsarnir litla möguleika gegn okkur í KA. Mikil málgleði Daða er í fínu lagi enda er hann þrælskemmtilegur en kom hópnun þó stundum í koll í verkfræðináminu þegar skilafresturinn var að renna út og hann bara rétt hálfnaður með sögur dagsins.“

Baldvin Þorsteinsson,
forstjóri Jarðborana



„Það sem fyrst vakti athygli mína varðandi Daða, þegar ég byrjaði hjá H.F. verðbréfum fyrir tæpu tveimur og hálfu ári, var

hversu agaður og iðinn hann er í vinnunni en á sama tíma mjög léttur. Hann hefur mikinn metnað og leggur sig ávallt allan fram. Innan fyrirtækisins er mikil ánægja með að hann sé að taka við sem framkvæmdastjóri og starfsmenn standa þétt við bakið á honum. Keppnisskap hans úr fótboltanum, leikgleðin og skilningur hans á liðsheild á ána efa eftir að nýtast honum vel í nýja starfinu.“

Íris Arna Jóhannsdóttir,
lögfræðingur H.F. verðbréfa.



AKUREYRINGUR Daði Kristjánsson er iðnaðarverkfræðingur með meistaraþráðu í fjármálhagfræði.

Vöndum betur til lagasetningar

Skoðun

Haraldur I. Birgisson,
verkefnastjóri á skatta-
og lögfræðisviði Deloitte



Símon Þór Jónsson,
meðeigandi á skatta- og
lögfræðisviði Deloitte



Eins og undirritaðir hafa áður fjallað um þá var lögum um tekjuskatt breytt í lok árs 2013 í þá veru að leiðbeiningar OECD um milliverðlagningu voru innleiddar, en þær taka til viðskipta milli tengdra aðila. Umrædd lög tóku gildi 1. janúar 2014 en í þeim var kveðið á um að ráðherra skyldi gefa út reglugerð um nánari framkvæmd þeirra.

Beðið í ár eftir reglugerð

Á morgunverðarfundum sem Deloitte held í mars í fyrra kom fram að fjármála- og efnahagsráðuneytið hygðist gefa út þá reglugerð í júní síðastliðnum. Því miður tafðist sú vinna og voru drög að reglugerðinni birt 13. október síðastliðinn. Í kjölfarið fundaði ráðuneytið með Deloitte og fleiri aðilum auk þess sem milliverðlagsreglurnar voru ræddar á fundi efnahags- og viðskiptanefndar Alþingis. Þegar þetta er skrifað hefur reglugerðin ekki verið gefin út.

Þrátt fyrir ágætt samráðsferli ráðuneytisins þá eru tafir af þessum toga bagalegar og skapa ákveðna réttaróvissu, því lögin hafa gilt um viðskipti tengdra aðila frá síðustu áramótum enda þótt inntak þeirra hafi ekki enn verið ákvarðað með reglugerð. Þá er jafnframt bagalegt að reglugerðar-drögin feli í sér viðbótarkvaðir sem alla jafna má ekki finna í nágrannaríkjum okkar og fela þannig í sér aukna reglubyrði fyrir íslensk fyrirtæki.

Takmarkað svigrúm til aðlögunar

Hvað tafirnar varðar þá helgast þær sumpart af aðdraganda lagasetningarinnar. Í stuttu máli var aðdragandinn þannig að í september 2012 skipaði ráðherra starfshóp til að undirbúa

upptöku milliverðlagsreglna, gera tillögur að slíkum reglum og semja drög að frumvarpi fyrir haustið 2013. Starfshópurinn skilaði áfangaskýrslu í maí 2013, en lokaskýrsla var aldrei birt. Engu að síður var frumvarp um reglurnar lagt fyrir Alþingi 29. nóvember 2013, það samþykkt 21. desember og tók það gildi ellefu dögum síðar.

Þótt áfangaskýrslan og frumvarpið séu ágæt lesning þá verður ekki fram hjá því lítið að leiðbeiningar OECD eru um 375 blaðsíður og á grunni þeirra hefur OECD birt fjölda tengdra rita sem spanna annan eins fjölda blaðsíðna og gott betur. Til samanburðar þá eru áfangaskýrslan og frumvarpið um fimmtán blaðsíður. Dýpt vinnunnar var þannig verulega takmörkuð samanborið við viðfangsefnið og í löggjafarferlinu var of lítið gætt að svigrúmi fyrirtækja til að aðlagast þessu umfangsmikla regluverki.

Reglubyrði aukin að óþörfu

Efnahags- og viðskiptanefnd gaf þó nýverið út í nefndaráli að fyrirtæki þyrftu ekki að útbúa svokallaða milliverðlagsskjölun fyrir en frá og með rekstrarárinu 2015 í stað 2014, sem er jákvætt út af fyrir sig í ljósi takmarkaðs undirbúnings. Það gagnast þó ekki nema að hluta þeim fyrirtækjum sem voru þegar byrjuð að undirbúa umrædda skjölun fyrir yfirstandandi rekstrarár með tilheyrandi útgjöldum.

Þá veldur það vonbrigðum að frumvarp sem lagt var fyrir Alþingi í nóvember, um breytingar á milliverðlagsreglunum, feli ekki í sér undanþágu fyrir aðila sem eingöngu eiga í viðskiptum við aðra innlenda aðila. Öll rök hníga að því að íþyngja slíkum aðilum ekki um of enda markmið leiðbeininganna fyrst og fremst að varna því að lögaðilar flytji skattstofna til annarra landa. Slík undanþága væri enn fremur í takt við nálgun margra landa og aðgerðaaætlan ríkisstjórnarinnar um einfaldara regluverk. Auk þess má finna dóma á vettvangi Evrópuþingmálsins sem rökstyðja að slík undanþága gæti staðist ákvæði EES-samningsins, þ.e. að ekki væri um mismunun að ræða.

Öll rök hníga að því að íþyngja slíkum aðilum ekki um of enda markmið leiðbeininganna fyrst og fremst að varna því að lögaðilar flytji skattstofna til annarra landa.

Samkvæmt upplýsingum Deloitte þá stendur vilji þeirra sem komið hafa að ferlinu til þess að undanþygja viðskipti á milli tengdra innlendra aðila og vera kann að það verði niðurstaðan þegar frumvarpið verður afgreitt sem lög á þessu ári. Þá mun þessi kvæð á innlenda aðila hafa legið fyrir í lögum í rúmt ár og kallað á kostnað fyrir þá aðila sem höfðu byrjað að vinna samkvæmt henni, án þess að hún hafi nokkurn tímann orðið virk í raun.

Færum ferlið til betri vegar

Það að Alþingi hafi ekki auðnast tími til að afgreiða áður nefnt frumvarp fyrir þinghlé í desember leiðir hins vegar til frekari tafa. Vonandi verður tíminn þó nýttur til að færa milliverðlagsreglurnar til betri vegar. Hvernig sem fer þá hlýtur að vera ljóst að ferli af þessum toga við setningu laga og reglna er vart til eftirbreytni, né þá heldur að leggja óþarfa byrðar á fyrirtæki án greinargóðs rökstuðnings.

Því er mikilvægt að draga lærdóm af þessari vegferð milliverðlagsreglna og vanda eftirleiðis betur undirbúningu laga á sviði skattamála, gefa fyrirtækjum meira svigrúm til að aðlagast þeim og bæta frekar samráð við innlenda sem erlenda hagsmunaaðila á öllum stigum til að draga úr líkum á að óþarfa reglubyrði verði leidd í lög.



HILDUR RAGNA KRISTJÁNSDÓTTIR



SIGRÚN JÓNSDÓTTIR

Logos ræður skrifstofustjóra og forstöðumann fjárhagsdeildar:

Nýir starfsmenn hjá Logos lögmannsstofu

Logos lögmannsþjónusta, ein stærsta lögmannsstofa landsins, hefur bætt við sig fjórum nýjum starfsmönnum. Þar á meðal hefur verið ráðinn nýr skrifstofustjóri og forstöðumaður fjárhagsdeildar.

Hildur Ragna Kristjánsdóttir hefur verið ráðin skrifstofustjóri. Hildur er viðskiptafræðingur frá Háskóla Íslands, með M.Sc.-gráðu í stjórnun frá BI-háskólanum í Ósló. Hildur er einnig útskrifuð sem markþjálfari frá fyrirtækinu Evolvía. Helstu verkefni skrifstofustjóra felast í umsjón með rekstrarsviðum félagsins. Hildur hefur margra ára starfsreynslu frá Nýherja og Eimskipum og hefur undanfarin ár starfað sem framkvæmdastjóri Heilsborgar.

Sigrún Jónsdóttir hefur verið ráðin forstöðumaður fjárhagsdeildar. Sigrún er viðskiptafræðingur frá Háskóla Íslands og hefur starfað sem verkefnastjóri hjá Deloitte síðustu þrettán ár. Hjá Deloitte sinnti Sigrún endurskoð-

un og uppgjöri stórra og smárra fyrirtækja, stýrði ýmsum starfsmannatengdum málum á endurskoðunarsviði ásamt umsjón með úttektum og gæðamálum. Sigrún mun bera ábyrgð á fjárreiðum félagsins og rekstri fjárhagsdeildar.

Þá voru einnig ráðnir tveir fulltrúar til að sinna lögfræðilegum verkefnum. Það eru þeir Freyr Snæbjörnsson og Kristófer Jónsson.

Freyr útskrifaðist með MA-gráðu í lögfræði frá Háskóla Íslands í janúar 2014. Hann hóf störf hjá LOGOS lögmannsþjónustu eftir útskrift en hafði áður starfað hjá fyrirtækinu sem laganemi samhliða námi frá árinu 2013.

Kristófer útskrifaðist með MA-gráðu í lögfræði frá Háskólanum í Reykjavík vorið 2014 en hann starfaði áður sem laganemi hjá LOGOS lögmannsþjónustu samhliða námi frá árinu 2012.